

RESOLUSI
MUZAKARAH HAJI PERINGKAT KEBANGSAAN KE-39
MUSIM HAJI 1444H/2022M
7 – 9 NOVEMBER 2022 / 12 - 14 RABIUL AKHIR 1444H

“AKIDAH SEJAHTERA ASAS KEMABRURAN HAJI”

Kertas Kerja 1

Tajuk : Persoalan Permasalahan Hukum-hakam Ibadat Haji Musim Haji 1443H

1. Selipar atau sandal yang dipakai oleh jemaah haji lelaki semasa dalam ihram hendaklah menampakkan tumit dan sekurang-kurangnya hujung tiga jari kaki.
2. Jemaah haji boleh menunaikan Solat Jumaat mengikut imam di Masjidil Haram ketika kesesakan sehingga terhalang dan menyebabkan terputus saf yang melebihi 300 hasta (135 meter) asalkan mereka mendengar secara langsung suara imam atau mengetahui pergerakan imam dari satu rukun ke satu rukun yang lain. Ini adalah berdasarkan pandangan Mazhab Maliki dan Hanbali.

Kertas Kerja 2

Tajuk : Kajian Semula Persoalan Jama' dan Qasar di Tanah Suci Berdasarkan Mazhab-mazhab Islam

3. Semasa perjalanan Makkah/Madinah/Jeddah/Malaysia, jemaah haji boleh solat jamak dan qasar. Namun jika ada masalah tidak boleh solat jamak dan qasar dalam perjalanan, jemaah haji boleh jamak ta'khir secara tamam apabila sampai di destinasi. Ini berdasarkan pendapat Mazhab Hanbali yang membolehkan Jamak ta'khir di destinasi, jika dia masih dalam keadaan musafir semasa tamat waktu pertama.

4. Mengikut pandangan fuqaha Maliki, Hanafi, Syafie dan Hanbali tidak boleh solat jamak dan qasar sebab musafir selagi belum keluar dari kediaman. Namun berpandukan pandangan yang membolehkan jamak kerana hajat, jemaah haji boleh melaksanakan solat jamak tamam di kediamannya jika diketahui kenderaan tidak berhenti sehingga waktu solat kedua luput.
5. Sekiranya waktu solat pertama telah masuk, sedangkan jemaah haji masih belum bermusafir, jemaah haji boleh melaksanakan solat secara jamak dan qasar dalam perjalanan sama ada taqdim atau ta'khir.

Kertas Kerja 3

Tajuk: Penilaian Semula Terhadap Syarat-syarat Wudhu' Daimul Hadath Berdasarkan Realiti di Tanah Suci

6. Jemaah haji yang mengalami daimul hadath boleh mengambil pandangan mazhab Maliki iaitu:
 - i. Membersihkan najis dan boleh mengambil wuduk sebelum masuk waktu solat.
 - ii. Meneruskan solat dengan wuduk yang sama selagi ia tidak terbatal oleh lain-lain perkara yang membatalkan wuduk.
 - iii. Memperbaharui wuduk itu adalah sunat sahaja.

Kertas Kerja 4

Tajuk: Pelaksanaan Ibadat Haji Menurut Sunnah Rasullullah S.A.W

7. Setiap mazhab fiqh mempunyai pandangan tersendiri dalam mengkategorikan kerja-kerja haji yang dilaksanakan oleh Baginda s.a.w. Ini bermakna bukan semua perbuatan Baginda s.a.w. semasa mengerjakan haji dinilai sama oleh ulama fiqh dalam setiap mazhab. Oleh itu rukun, wajib dan sunat haji berbeza mengikut mazhab-mazhab ini.

8. Kekangan operasi dan peraturan yang ditetapkan oleh kerajaan Arab Saudi dalam menguruskan jutaan jemaah seluruh dunia menyebabkan beberapa kerja-kerja haji yang sunat tidak dapat dilakukan. Oleh itu, amalan haji yang diuruskan oleh **TH** secara keseluruhannya tidak boleh disalah ertikan sebagai bercanggah dengan sunnah.

Kertas Kerja 5

Tajuk: Kajian Hukum Penjualan Pakej Haji Furada dan Mujamalah

9. Tindakan syarikat yang menjual pakej haji furada/mujamalah sebelum mendapat tawaran visa mengandungi gharar besar yang boleh merosakkan akad. Syarikat hendaklah melewatkkan akad jualan selepas mendapat tawaran visa. Deposit (*hamish jiddiyah*) boleh diambil sebelum berakad, namun perlu dipulangkan kepada pelanggan jika visa gagal diperolehi.
10. Syarikat yang mengendalikan Jemaah haji furada hendaklah memastikan bimbingan ibadat haji jemaah ini selaras dengan modul Bimbingan Haji **TH** dan keputusan Muzakarah Haji Peringkat Kebangsaan.

Kertas Kerja 6

Tajuk: Penghayatan Sifat Sabar dan Syukur Dalam Pelaksanaan Ibadat Haji

11. Penghayatan sifat sabar dan syukur sangat dituntut dalam syarak terutamanya dalam melakukan ibadat, khususnya dalam ibadat haji dan umrah.
12. Modul Bimbingan Haji hendaklah memupuk penghayatan ini dalam kalangan jemaah haji supaya perjalanan dan pelaksanaan ibadat haji sempurna dan memperolehi haji yang mabrur.

Kertas Kerja 7

Tajuk: Penghayatan Talbiah dan Kesannya Dalam Akidah

13. Ucapan talbiah secara keseluruhannya memberi penekanan supaya mentauhidkan Allah s.w.t dan menjauhkan perbuatan yang membawa kepada syirik serta mengekalkan kemaburuan haji sepanjang hayat.

14. Jemaah haji sewajarnya mendalami dan menghayati maksud talbiah kerana ia menjadi benteng ampuh dari melakukan perkara-perkara yang membawa kepada syirik samada semasa di Tanah Suci atau selepas balik ke Malaysia.